


1 IUNIE

**ACATISTUL
SF. CUVIOASE
ANIMAISA
SMERTINA
DE LA
OTREȚOVO**



ACATISTIERUL PE IUNIE-RU



АКАФИСТ ПРЕПОДОБНОЙ АНИМАЙСЕ РОДНИКОВСКОЙ И ОСТРЕЦОВСКОЙ

Кондак 1

Избранную Невесту Христову, / Родниковской земли
святилицу, / песньми восхваляем днесь, вернии, /
преподобную мати нашу Анимайсу, / в годину
гонений лютых верность Христу сохранила еси, /
крестный путь исповедничества избравшую, / и
плотию преставльшися, нас не оставила еси, / ныне
же молит Христа Бога о душах наших, / присно
предстательствуя за ны, / сего ради мы тако
возопиим: /

Радуйся, преподобная мати наша Анимайсо, /
исповедница Христова всечестная!

Икос 1

Ангельски на земли поживши, преподобная,
исповедничеством своим угодила Христу, сего ради
небесныя радости причастия сподобилася еси по
успении своем. С горних высот ныне призри на ны, с
любовию тя величающих:

Радуйся, Российския земли похвало. Радуйся,
голубице непорочная. Радуйся, девственнице чистая.
Радуйся, инокиням утешение. Радуйся, благочестия
звезда. Радуйся, заступнице к тебе притекающих.
Радуйся, целительнице недугов безмездная. Радуйся,
ходатаице за ны теплая.

Радуйся, преподобная мати наша Анимайсо,

исповедница Христова всечестная!

Кондак 2

Видев тя, преподобная, подвиг иноческого жития возлюбившую, бурю житейских бед и напасти суетнаго мира презревшую, сподоби с тобою вкупе Единому Небесному Жениху поработати, поюще Богу: Аллилуиа.

Икос 2

Разумом свыше просвещенная, в обители святаго Макария Желтоводскаго и Унженскаго постриг принявшая, в трудах и послушании пребывала еси, целомудрие соблюдая. Темже тя ублажаем, яко сосуд благочестия, поюще сицевая:

Радуйся, путь иноческого жития избравшая.
Радуйся, открывающая нам своими молитвами пути спасения. Радуйся, Духа Божия Святаго вместилище.
Радуйся, Богом в Троице умудренная. Радуйся, ко благому свыше укрепленная. Радуйся, разум просветившая молитвою. Радуйся, совесть стяжавшая чистую. Радуйся, ведением путей благочестия умудренная.

Радуйся, преподобная мати наша Анимаисо, исповедница Христова всечестная!

Кондак 3

Силою Вышняго укрепляема, возлюбила, преподобная, нищелюбие; в прилежании и послушании Богу в Троице Божественную мудрость стяжавшая, ею же укрепляет каждого человека,

поюще Господеви: Аллилуиа.

Икос 3

Имаше во обители, преподобная, усердие молитвенное и нестяжание, ко спасению наставляющей, молим тя, всехвальная, призри на ны и направи нас на путь истины, тя величающих:

Радуйся, молитвами ключ мудрости улучившая. Радуйся, тем отверзшая двери благочестия ищущим. Радуйся, умиленная Христовым снисхождением к роду падшему нашему. Радуйся, Богу Единому поработати возжелавшая. Радуйся, в чертог славы Его всельшаяся. Радуйся, светом благочестия и молитвы просиявшая. Радуйся, Священное почитавшая Благовестие. Радуйся, от Сего узрившая мира горняго и дольнего творение.

Радуйся, преподобная мати наша Анимаисо, исповедница Христова всечестная!

Кондак 4

Буря безумных гонений на Церковь Христову путь новаго подвига открыла тебе, преподобная. Молитвою ко Господу согреваема, в сердце верном мужество сохранила еси, взывая к Богу в Троице: Аллилуиа.

Икос 4

Сила вражия обитель святую разориша и насельниц изгнаша; ты же силу Божией любви негасимым светом явила еси и в мире суетном, полном бесовских напастей в истине устояла еси, темже, подвиг чести твой величающа, возопиим

сицевая:

Радуйся, праведнаго жития образе. Радуйся, послушания Божественной воле утверждение. Радуйся, Богом венчанная подвижнице. Радуйся, адских страхований не испугавшаяся. Радуйся, со смирением крест свой понесшая. Радуйся, мирскаго мятежа не убоявшаяся. Радуйся, мужества примерная наставнице. Радуйся, Божия избраннице.

Радуйся, преподобная мати наша Анимаисо, исповедница Христова всечестная!

Кондак 5

Бога паче живота возлюбившая, преподобная, житие иноческое в миру понести не утрашилася еси, тяготы и тесноты его презрела еси; притекши в землю Родниковскую, ведомая гласом Божиим. Темже с тобою вкупе Господу тако возопиим : Аллилуиа.

Икос 5

В веси Острецовския послушницею Пресвятая Троицы явилася еси, преподобная мати Анимаисо, ближним безмездно служащи, во смирении и терпении плоды добродетели явила еси. Темже тя хвалим достойно:

Радуйся, одеяниям преиспещренным мира скромное рубище иноческое предпочевшая. Радуйся, Крест Христов, яко хоругвь священную веры приемшая. Радуйся, яко утвердил тя Господь во уповании. Радуйся, возложившая руки на рало духовнаго делания. Радуйся, главу покрывшая куколем незлобия. Радуйся, землю Родниковскую для

спасения от Бога получившая, яко ниву стяжания добродетели. Радуйся, подвига смиренная наставнице.

Радуйся, преподобная мати наша Анимаисо, исповедница Христова всечестная!

Кондак 6

Всяк подвизаяйся, от всех да воздержится. Таковое реченное апостолом слово держала еси делом, мати преподобная. Постом и молитвою неослабно поживше, суесловия избежала еси. Песньми и псалмами славословяще и в добром устроении утверждающихся, Богу воспела еси: Аллилуиа.

Икос 6

Возсия свет благодати в подвизах твоих, Анимаисо, мати наша богомудрая, в твоих наставлениях всем, притекающим к тебе с верою. Образу жития Игумении Небесныя своея подражающа, при храме, яко некогда Отроковица, подвизалася еси. Сего ради и мы ныне воспоим:

Радуйся, земли родниковския радование. Радуйся, девам похвало и венец сиятельный. Радуйся, звездо благочестия. Радуйся, смирения исполненная. Радуйся, с молитвою скорби терпевшая. Радуйся, при храме, якоже древле Отроковица, пребывала еси. Радуйся, упования неложное исполнение. Радуйся, пути спасения указующая.

Радуйся, преподобная мати наша Анимаисо, исповедница Христова всечестная!

Кондак 7

Седмерице сродник твоих, мати всечестная Анимаисо, пытки и умерщвления от богоборец претерпеша, с небесе тя укрепляюща, аки осьмый столп веры и благочестия Истины у Христа Бога тя испросиша. Да ключи Царствия Небеснаго сохраниша, народу русскому надежду спасения у Престола Пресвятыя Троицы исходатайствуеши, воспевающа: Аллилуиа.

Икос 7

Милосердием Божиим хранимая, подвизи свои свершила еси, предивная в силе Божией наша мати. Божие жилище, храм Пресвятыя Троицы от святотатцев и супостат упасла еси, грядущих мучений не убояшася. Тако крепкою десницею Господней от вражиих поруганий восхищена еси. Сие милосердие Божие зрящи, воспеваем сицевая:

Радуйся, укрепление в скорбех с небеси получившая. Радуйся, священномученика Петра чадо духовное преславное. Радуйся, угрозы безбожников презревшая. Радуйся, ключи церковныя сохранившая. Радуйся, в терпении и мужестве веру Христову явившая. Радуйся, безстрашно Бога в Троице исповедавшая. Радуйся, гордых безумцев вразумление. Радуйся, покровом Пречистыя Девы огражденная.

Радуйся, преподобная мати наша Анимаисо, исповедница Христова всечестная!

Кондак 8

Двери Храма по времени отворила блаженная вратарнице, избранным сохранила убранство в нетлении. И новым служением алтарницы таинственное делание продолжила еси. Сего ради Богу Всесильному возопиим: Аллилуиа.

Икос 8

Велию Милость Господь верным душам дарует, образы благочестия восхваляя. Ревностию по Бозе и укреплением чад Божиих духом неугасающим, сими добродетельными делы исполнились дни твоего служения, благочестивая проповеднице и наставнице. Сего ради величаем тя:

Радуйся, благий ярем Христов подъемшая. Радуйся, ключи сокровенныя веры родной сохраняющая. Радуйся, служителя Бога с усердием встретившая. Радуйся, в непоруганной святине Господа славящая. Радуйся, во святая святых вшедшая. Радуйся, радостью послушание во алтаре Божиим исполнившая. Радуйся, ревностно подвижи свои творящая. Радуйся, маловерных укрепление.

Радуйся, преподобная мати наша Анимаисо, исповедница Христова всечестная!

Кондак 9

Венцы нетленные приявшая, с небеси зриши ныне на тленные человеки, мати чистая. И по мирном успении твоём чад своих не оставляеши, сего ради и мы со ангельскими лики умиленно вопиём Богу, пославшему тя в горестный мир для утешения

нашего: Аллилуиа.

Икос 9

Витии мудрыя памятование слова Христова проповедаша, яко велий наречется во Царствии Небеснем исполнивый едину от малых заповедей Господних. Ты же, благочестием украшенная, преподобная мати наша, поучением сестер своих во Христе, таковая соделала еси. Сего ради восхвалим твое усердие:

Радуйся, неложно старших почитавшая. Радуйся, скорбных утешающая. Радуйся, образе смирения и благолепнаго обхождения с малыми мира сего. Радуйся, обличительница осуждения и многословия. Радуйся, приятельнице дара прозрения. Радуйся, вопрошающим мудрая советнице. Радуйся, миротворице сварящихся. Радуйся, добродетелей сокровище.

Радуйся, преподобная мати наша Анимаисо, исповедница Христова всечестная!

Кондак 10

Радостию велией сердца наша исполняеши, яко имеем тя скорую заступницу на небесех. Дивному дару твоему врачевания немощей лютых удивляемся, и помощи в тяжких обстояниях чающа, Богу, тя нам, яко ангела светлаго, пославшему, воспеваем сицевая: Аллилуиа.

Икос 10

Славою Божией покрыто место твоего упокоения, милосердная, и помощь скорою всем с надеждою к тебе притекающим является. Немощствующих ты еси исцеление, нищим и алчущим покровительнице верная, в скорбных обстояниях помощнице усердная, в болезнях духовных и душевных врачевательнице. Сего ради благодаряще воспеваем ти:

Радуйся, чертога Небеснаго насельнице.
Радуйся, о нас, немощных, молитвеннице. Радуйся, дара врачевания душ и телес приятельнице. Радуйся, мира по успении своем не оставившая. Радуйся, радости Небесныя причастнице. Радуйся, и нас утешениями не оставляющая. Радуйся, под Сению Небесною, яко плод добрый, возвращенная. Радуйся, земель Костромских светильнице. Радуйся, тяготы земныя нам нести помогающая.

Радуйся, преподобная мати наша Анимаисо, исповедница Христова всечестная.

Кондак 11

Песньми восхваляющая тя, радуется добрый град Родники; дух твой на небеси ликовствует, на земли же честныя мощи твоя, мати наша Анимаисо, во храме Святаго благовернаго князя Александра Невского покоятся. В пренесении же мощей множество чудес сотворила еси, благоуханием райскаго сада чудо спасения нам возвестивше. Мы же, видя милость Божию велию, поем во умилении: Аллилуиа.

Икос 11

Светозарная луча земли Родниковския! И поныне светиши духом своим, пребывая с нами присно. Мы же, поклоняющиеся Богу в Троице, просим и твоего скорого предстательства за ны, вопиюща таковая:

Радуйся, земли Родниковския сияние. Радуйся, похвало Богу в Троице и славо. Радуйся, венцем славы от Небеснаго Жениха Христа увенчанная. Радуйся, собеседнице благословеннаго лика праведных. Радуйся, преподобия образе. Радуйся, мужества источнице. Радуйся, милость Божию нам являющая. Радуйся, недуги наша исцеляющая.

Радуйся, преподобная мати наша Анимаисо, исповедница Христова всечестная!

Кондак 12

Благодати причастнице, усердно молим тя, Анимаисо всехвальная, пролей теплое твое моление ко Господу сил за землю Русскую, в скорбех и бедах пребывающую. И, яко дочь избранная, упроси Бога в Троице, да подаст милость земли нашея и избавление от ига лукаваго соделает. Сего ради воспоем Господеви: Аллилуиа.

Икос 12

Поюща тя, яко заступницу нашу теплую, народу русскому покров и утверждение. Радуюмся о тебе, преподобная, яко орудием спасения нашего ты Господь содела. С любовью ты величаючи, воспоем сицевая:

Радуйся, всельшаяся в скинию святых. Радуйся,

незримая о нас ходатаице. Радуйся, больных и страждущих врачевание. Радуйся, печальных утешение неложное. Радуйся, отрадо скорбящих. Радуйся, опорой крепкою ты призывающим являющаяся. Радуйся, заступнице наша теплая у Престола Божия. Радуйся, путеводительница славная ко спасению.

Радуйся, преподобная мати наша Анимаисо, исповедница Христова всечестная!

Кондак 13

О, преподобная мати наша Анимаисо! Моли за ны Бога в Троице, да укрепит наша немощныя силы и ко спасению управит, соблюдая в чистоте и вере, сотворении добродетели, девствующим сохраняя, в супружествах сущих благочестие благословляя, любовь и мир сердечный совершя, недужных врачя, омраченных просвещая. Да вся спасаемая в чертози небесныя Господь по времени управит, идеже Ангели поют: Аллилуиа.

(Сей кондак глаголится трижды, затем читаются первые икос и кондак).

